



Minggu, 28 Agustus 2022
Ogen: MAZMUR 23:5-6



Melias Dingen Perkeleng



Ibas kita kalak Karo, penting kal man. E maka bas kerina dahin-dahin perjumpaan iupayakan nge gelah lit nakan gelah man. Kalimbubu mere benih man anak beru, gelah lit man panganna. Adi lit sada kejadiin si ermeriah ukur entah ceda ate, reh nge kalimbubu ngembahkan nakan rikut ras toto man anak beruna pe. Jadi man e, i bas kita kalak Karo e me kap kite-kite dalam ngerana, jadi palas si mpetetap ukur ras mereken ketenengen. Manuk sangkepi, em salah sada pangan khas Karo. Manuk si igule jenari isusun rapi bas pinggan, idudurken ras nakan tasak, jadi symbol toto gelah singalokenca pe kuh kemalemen atena, desken ring-ring manuk e la lit sikurangna. Bagem nai beluhna nini-nininta ncibalken lias ras keleng ate si man ikutenken seh bas paksa enda.

Tapi labo leluhurta ngenca ncidahkan keleng ate arah pangan. Dibata selaku permakan si tuhu-tuhu pe njamin kerna perpanganenta. Subuk pangan secara pertendin bage pe pangan man kulanta enda. *IaturkenNdu kerja si mbelin man bangku...ielaiNdu aku alu inemen seh riba-iba.* Labo terjeng bias, tapi adi akapNa perlu ibereken Tuhan riba-iba gelah banci ka kita ermeriah ukur katawari paksa. E maka ipujiken pemasmur me Tuhan Dibata, ikatakenna "kuteh maka lalap Kam melias kempak aku...kuteh maka tetap ateNdu keleng man bangku". Bagem cara Tuhan nuriken keleng ateNa.

Arah ogen enda kita ndat sada pemeteh si mbaru, maka mereken pangan ras ngidangkenca pe banci jadi Bahasa Cintanta man anak jabu ntah pe man temanta manusia. Pangan si isikapken, itangger alu keleng ate, em jadi bumbu si sedapna. Man ras-ras dingen ertoto em rumah makan si mewahna. Ndatken pengajaren kenca elah man, ijeme sekolah si meganjangna. Mari ula kikat, tanggerlah pangan man anak jabunta, bereken pangan siberkualitasna kal man kalak si ikelengi kita.

☞ Keleng ate la terjeng ibelasken, tapi banci isajiken.